

PARADA DI ORANJESTAD GRANDI PERO FALTA DI AMBIENTE MUSICAL

ORANJESTAD(AAN): Si bay tras di comentaronan di hendenan cu tabata na diferente puesto di ruta di carnaval y cu a comenta riba e parada, por a scucha cu e ambiente musical tabata falta grandemente.

Ningun di e bandanan no a resona di gaba, cu excepcion di Quassie cu a deleita e publico na final di parada.

Hasta Eclipse y Musical Time cu ta ser considera "grandi" den carnaval, ayera no a logra e animacion di custerbier.

Un banda cu a wordo comenta na Noord como e "banda di mas malo" pero di ambiente mas festival tabata "Banda de Tio Juan."

Ayera sinembargo, e musiconan di e banda aki a tira spicerij y tur sorto di condimento den nan musica, durante Lighting Parade, di e anochi anterior, y a resona hopi bon lantando publico hasta canto di caminda.

"Di unda e cos aki a sali mi no sa, pero nan ta zona bru!", un miron a comenta canto di e ruta.

E parada tabata anima pa cantidad di Disco, pero tres di nan a zona formidable pa parada, y tabata Chocolate City Disco, Eddy TEC y tambe Disco Placentero.

tur e otronan tabata mucho debi pa anima parada di carnaval locual a baha e animo di diverticion tambe y gozo di

tanto participantenan como mirones.

E parada di mucha di Oranjestad, sigur tabata grandi, 2 ora largo fuera di e mas o menos mey ora di "paralizacion" en total. E tabata tin su luho di custerbier den dje, y tambe gruponan original masha bunita, sinembargo, e

no tabata "E Gran Parada di Carnaval di Mucha di Oranjestad", manera Aruba sa custumbra di dje.

Tabata tin gruponan cu sigur a sobresali den e parada ayera, manera e grupo di Bille y Monedanan di Aruba, di Santa Cruz, Ban Goza di Noord, Mermaid Fantasy di

Savaneta, Ragedy Ann and Andy di Caribe, y Guardians of Flame di Dakota pa menciona algun, mientras cu mester menciona e bunita carosa-Roadpiece di "We are the world" y e grupo di Chikitin Bin Bin cu pa su fantasia tabata un di e gruponan mas admirable, tanto na Noord como na Playa ayera.

E parada di mucha tabata bunita, y grandi, cu falta di bon musica di animacion pa gruponan, y por hasta bisa cu por a nota cierto caida den e parada aki e aña aki, debi na gastonan hopi halto, y sigur tambe spaarmento pa sali otro aña cu un "explosion di 40 aña" di carnaval.

E parada di Noord cu su duracion di un ora, tabata mihor coordina cu mihor continuidad, y apesar cu eynan tambe bandanan musical no a anima na cantidad y cu hopi a depende di Disco, e ambiente musical tabata hopi mihor cu na Playa ayera y e parada di Noord a resalta mas cu esun di Oranjestad.

Qua-si

ORANJESTAD(AAN): Na final di parada di mucha ayera, e ambiente real carnavalesco a ser mira ora cu centenares di hende a pega tras di Qua-si y a jump te final di ruta cu nan, y masha bon dirigi pa agentenan policial tanto masculino como femenino.

"Esaki ta e ambiente di final di parada na San Nicolas siman pasa, y e ambiente cu por ser spera diasabra awor tanto den Jouvert Morning como den parada di San Nicolas," a ser comenta.

"This is marvelous", un turista femenino a sclama na algun otro para canto di e ruta y cu mes ora a bula den parada.

Qua-si e aña aki pa su participacionnan a logra un promocion formidable pa nan orquesta.

Pero e felicitacion mester bay tambe na Tatoo cu a mira cu su "Jump with your towel", a domina den tur parada di carnaval cu a ser teni te awor, y cu banda di ruta unda cu e banda a yega, hasta cu "tissue paper" y "papel di cushina" na man, e hendenan tabata zwaai, bailando riba e ritmo di "Back and front" aki.




LIGHTING PARADE BELLEZA ATROBE PERO CHIQUITO

ORANJESTAD(AAN): Algu cu ta gusta wordo haci na Aruba ta comparacion, y cu e Lighting Parade di Aruba Tivoli Club diasabra anochi, por a tende atrobe comparacionnan cu e no tabata manera aña pasa di dos aña pasa, y den mesun rosea ta resalta su buniteza.

Miles di hende un biaha mas a aglomera banda di e ruta di Lighting Parade, pa no perde nada di e spectaculo di color y luz cu ta ser presenta anualmente un siman prome cu Carnaval.

Diasabra anochi por a ripara cu e gruponan cu a participa cu nan piezanan di Walt Disney, fienan y deporte, a parce menos cu añanan anterior, sinembargo e duracion di 45 minuut a muestra sinembargo cu e tabata basta largo y en general tur hende a goza un mundo di e buniteza cu nan a mira y cu bon animacion musical.

Tanto den Vondellaan como den Lloyd G. Smith Boulevard por a tende expresionnan



di "oohh, aaah", di principalmente turistanan cu tabata riba caya pa mira e show di luz, saca portret y nan videonan.

E file cu tabata draai tabata ricibi aplauso tur caminda cu el a pasa, hopi aplauso sigur tambe e grupo di Samba na final a cosecha di mirones du-

rante henter e ruta.

Por a ripara un biaha mas cu e fantasia di uso di luz pa decora piezanan, e trabao tecnico cu aña tras aña ta birando mas profesional y e diseño di e piesanan ta keda resalta.

Lighting Parade un biaha mas a duna un realce na nos carnaval y a demostra cu e ta

keda un di e actividadnan callejero mas bunita di Carnaval di Aruba.

TELEFONAN di DIARIO
22207-26747-35023